

դացին ասում է «ոսկի մատանի», «արծաթ դոսի»:

Ուրեմն Լ. Գրէյլի առաջարկածը լեզուական աղճատում է:

Յետոյ՝ ի՞նչ հիմքով «հերք» որոշ է, իսկ «մօրուսն» անորոշ. ինչո՞ւ Վահագն «զհեր հրոյ» ունէր, բայց «մօրուս բոցոյ» եւ ոչ «զմօրուս բոցոյ»:

Եւ վերջապէս «հեր հրոյ» եւ «մօրուս բոցոյ», չի նշանակում «հուր հեր» եւ «բոց մօրուս», այլ մի հեր, որ հուրինն է եւ մի մօրուս, որ բոցինն է. իսկ ո՞ւր մնաց հապա Վահագնի սեփական մագն ու մօրուքը...

Հետեւեալ երկու յաւելումները վերաբերում են Գ. Մազիստրոսի պահած հատուածին, որի վերջին տողն ասում է.

Մեք փող հարուաք եւ թմրկի հարկանէաք
Հեղինակն առաջարկում է այսպէս տրոհել ու կարդալ.

Մեք որք փող հարուաք եւ

զըթմրքի հարկանէաք

Բայց ինչո՞ւ «մեք»ը դարձած է «մեզ» եւ աւելցած է «որք» դերանունը «որքք» ձևով: Նախ՝ զուգաթեւ վանկեր ստանալու համար: Ապա վարի տողը, որ նրան թուում է անկապ՝ վերի բացական թեանը կցելու համար: Նա կարծում է, որ մահամերձ թագաւորն ասում է.

«Ո՞վ կը տար մի Նաւասարդի առաւօտ մեզ, որ փող էինք փչում եւ թմրուկ զարկում»: Մինչդեռ «Ո՞ տայր» խօսքն ունի իր խնդիրը, որ է «ինձ» — «Ո՞ տայր ինձ դժուխ ծխանի»... Թագաւորն ասում է, «Ո՞վ կը տար ինձ ծխանի ծուխն ու Նաւասարդի առաւօտը, եղների վազելն ու եղջերունների արշաւը»: Եւ յետոյ յիշում է որսական մի տեսարան. «Մենք փող էինք փչում եւ թմրուկ զարկում»: Իր ուղածը ծխանի ծուխն է, Նաւասարդի առաւօտը եւ եղնիկների վազքը. եւ այդ ուղում է ո՛չ նրա համար, որ իրանք փող էին փչում եւ թմրուկ զարկում, այլ որովհետեւ այն ժամանակ առոյգ էր եւ ոչ մահամերձ հիւանդ: Նա իր առոյգ տարիներն է ուղում, որ յետ դան եւ իր սիրելի որսական հանդէսները Նոր Տարուան:

Լ. Գրէյլի առաջարկած ուղղումը ոչ միայն դասական չէ, ոչ միայն գրաբար չէ, այլ մինչեւ իսկ հայերէն չէ: Հայերէնն ո՞վ է տեսած կամ լսած «որ» դերանունն այս տեսակ գործածութիւն:

Աշխարհաբարն ասում է. «Ո՞վ հանդիստ կը տայ մեզ, որ տառապեցինք»: Գրաբարն ասում է. «Բա՛ց մեզ Տէր, զբուռն ողորմութեան, որ ողբալով կարգամք առ քեզ». եւ ոչ թէ «ո՞վ կը տայ մեզ, որոնք... կամ՝ «բաց մեզ, որք... (Վերջը յաջորդով)

ՀԱՅ ՅԵՂԱՓՈԽԱԿԱՆԻ ՅՈՒՇԵՐԻՑ

Գրեց՝ ՌՈՒՔԷՆ ԽԱՆ-ԱԶԱՏ

Դ. ԳԼՈՒԽ

ԻՆՉՊԷՍ ԿԱԶՄԱԿԵՐՊՈՒՅՑ
ՀՆԱԿԵԱՆ ԿՈՒՍԱԿՅՈՒԹԻՒՆԸ

Ասացի, որ Փորթուղալեանի հետ մեր յարաբերութիւնը խզուելուց յետոյ, սկսեցինք մտածել՝ մեր սեփական սպարանն ու թերթն ունենալ: Դա ի հարկէ, այնքան էլ հեշտ չէր կիսաքաղց ուսանողների համար:

Մեր խմբից ամենաապահովներն էին Նազարէկեանը, օր. Վարդանեանը եւ Ք. Օհան-

եանը. իսկ միւս երեքս՝ Կաֆեան, Ղարաջեան եւ ես անապահով ուսանողներ էինք:

Կաֆեանը, ճիշդ է, հարուստ վաճառական եղբայրներ ունէր Թիֆլիսում եւ Բագուում, բայց նրանցից ոչ մի կոպէկ չէր ստանում: Դեռ եւս Թիֆլիսի ռեալական դպրոցի չորրորդ դասարանից եղբայրները ցանկացել էին նրան ուսումից զրկել եւ իրանց առեւտրական գործի մէջ դնել. իսկ նա փախել էր, նախ ընկերների օգնութեամբ Թիֆլիսում էր անկախ ապրել ու սովորել մինչեւ Թ-րդ դասարանն ու ապա Եկեղ